



**Nobel Peace Prize atema tepuokdak  
alisang Imran Khan nominate asü**

**Shah-i 2026 kum tashi nungbo  
Naxalism samatsütsü nangzük**

## Apr 2 nungi scholarship agütsütsü: ANCSU

**Dimapur, April 1, 2025 (TYO):** April 2, 2025 nungi 2023-2024 atema Post Matric Scholarship ST indang installment 3 buba agütsütsü.

Iba osang ya Directorate of Higher Education-i All Nagaland College Students' Union (ANCSU) nem sangoktsüba lir.

Iba atema ANCSU-i kaketshirtem dang bank account shitak ayutsü metetdaksüogo.

State sorkar, Higher Education & Tourism Minister

aser bangdak department-i kaketshirtem nem scholarship agütsütsü asoshi temulung agütsüba atema tenüngsang agütsür. Parnoki Ministry of Tribal Affairs, GoI den osang metetpelaa aruba aser withdrawal authority renemba atema pelar ta Media Cell, ANCSU-i metetdaksü.

Parnokisa bangdak department dang 2024-2025 atema PMS ST installment 1 buba memenui agütsütsü mepishia metetdaksüogo.

## Mariani nung Assam-Nagaland arrtsü tebilemstsü tuluba akümer

**Jorhat, April 1, 2025 (TYO):** Küm aika Assam-Nagaland arrtsü atema ashishitepa aruba onük tuluba kumogo aser iba ya tesüiba hopta ishika lendong kar ataloka aruba ajanga lir.

Item tatalokba ajanga Jorhat district kübok Mariani nung alirtem Nagaland-i oa alitsü bilemer.

March 31, 2025 aonung tesüsa amak aser iba ya anogo 10 nung asemben amakba lir aser item tatalokba ajanga nübortem tetsübu tia ka nung lir.

Hombar aonung arrtsü adena oa alirtemi Rajabari yimsüng amak aser parnoki aou agi atsü atsüa aliba raksatsü, injang khatok aser yimdaklir kar dak teka sangshi.

Iba mapang yimdakir pezü-Bikram Pradhan, Joydeep Patar Tanti, Akash Patar Tanti, aser Sanjeet Patar Tanti nung pur ao. Parnok pur aoba sülen blank papers nung tashiyim agi sign südaksür chiok.

Ibala tatalokba ajanga arrtsülen alirtem tetsübu tia ka ajurua lir.

"Iba ya tang tasen atalokba ka masü. Naga nung ozüing alema

inyakertemi mapang talangka nungi onok ali atsünga agia arur. State sorkar aser local administration-i onok kümzüka meyura onok Nagaland nung oa alitsüsa akümtsü" ta yimdaklir kati ashi.

"Karmakar ta ser yimdaklir kati journalists nem osang sangoktsüba sülen par ki toktsür jena ao. Naga nung ozüing alema inyakertemi item tatalokba press dang mashitsü tetuyuba agütsü aser parnoki pa amokmeren" ta paisa ashi.

Tesüiba ita ishika tsünga ozüing alema inyakba Naga nungertemi ali atsünga agitsü atema Assam telungi aiter aremtem raksatsür aser nisungtem aridoker.

March 20 aser March 28 anogotem Dissoi Valley Reserve Forest aser Tiru Hills nung mi senoktsüba lendongji Naga nungertemi liasü ta tai tongloksür.

Sorkar ketdangsürtem nungi telangzüba kecha manguba agi Mariani nung alirtemi parnok lendong nungi jenbua alitsü atema talidak toktsür Nagaland nung oa alitsü bilemer.

## Tanü Opposition-i Waqf Bill anema vote asütsü

**New Delhi, April 1, 2025 (Agencies):** Bodbarnü Parliament nung Waqf Amendment Bill atema olemteptsü aser iba anema vote asütsü ta Opposition bangjemtepogo.

Mongulbar nikongdang Opposition party ajak senden ka amendang iba lemtet agi.

"Onoki bill atema olemtepba nung shilem agitsü aser bill magizüksü atema noktaksü" ta RSP MP NK Premachandran-i ashi.

Iba ashishitep aketba bill ajanga India nung Waqf

properties anepaluba aser ketdangsüba tajungba akümtsü meranger. Bodbarnü Lok Sabha nung iba bill benoka jembitsü aser agizüksü merangtsü.

Waqf Amendment Bill olemteptsü atema ghonda 8 shi lemozüka lir ta union minister Kiren Rijju-i ashi.

Opposition-i iba bill ya ozüing alema lir ta aitsür.

Congress-i parnok Lok Sabha MP ajak taruba anogo asemnü Parliament nung adentsü atema whip ka agütsüogo.

## Kitovi-i Khehoyi camp atsünga agi: GPRN/NSCN (Unification)



**Dimapur, April 1, 2025 (TYO):** "Khehoyi nung designated camp ya onok meyong aser N Kitovi Zhimomi-i aniba GPRN/NSCN (U) teloki ozüing alema atsünga agia lir" ta GPRN/NSCN (Unification) Ato Kilonser Alezo Venuh-i ashi.

GPRN/NSCN (U) pur tanü Thahekhu nung joint council meeting ka menogo aser idangji March 22, 2025 nü Khehoyi camp atsünga agiba onük lemsatep.

Iba camp ya tangari masü saka temulung lemtetba ketdangsür kari Kitovi'er telok den miima tasa atonger atsünga agiba liasü. Khehoyi camp ya GPRN/NSCN (U) meyong lir aser onoki camp toktsür mao ta Alezo-i ashi.

GPRN/NSCN (U)-isa parnok army, civil personnel aser unit ajak shitak dang lir aser onoki Naga nungeri aginüba ama putepshitsü mulunga lir, ta paisa ashi.

March 22 nü Kitovi telok nungi Khehoyi camp-i aruba Naga army jagi putepshitsü ta shir ait saka armoury nungi prangpong-injang ajak agi, ta GPRN/NSCN(U)-isa ashi.

Neokpao Konyak aser C Singson na lenisüba kübok GPRN/NSCN (U) aser India sorkar tsünga 2012 nung ceasefire nung sign sütep aser iba amaji inyaka arur. India sorkari GPRN/NSCN (U) dak temulung alemba agi onok den ceasefire aliba sangdong aser iba tangatetba nung dang arudar ta GPRN/NSCN (U)-isa ashi.

"President Gen. (Retd.) MB Neokpao Konyak, kilonsers, army

units, aser regional commanders ajak loksa mao dang lir. Army personnel aser civil officers kar dak alaka sorkar shitak dang lir" ta Alezo Venuh-isa ashi.

Brig. Kiyeto Zhimomi-i camp atsünga agitsü atema Kitovi den külemi tasa atonga inyak. Iba kuli ya onoki tejangja meteta lir ta paisa ashi.

Kitovi-i osangbener dang telok ka kuma longjemtsü atema meranga iba mapa inyak asütsü aser tashiyim agi atsünga agiba memetet ta metetdaksüogo saka iba ya tiyazü lir ta Venuh-isa ashi.

"Naga Republic Day benjung amungba sülen lennir teimba ka camp nung malidang atsünga agi. Parnoki putepshitsü atema aru ta ashi saka camp telungi aitiba sülen prangpongtem putena ao. Parnok tebilemba tajung ali asübo yamaji meinyaktsü" ta Kilo Kilonser Huvito Yephthomi-ia ashi.

Iba tatalokba sülen tanishirtemi camp nung alirtem anema inyaktsü bilemdang saka iba ajanga azütokshitep adoktsü ta angateta president MB Neokpao Konyak dang medical ground nung camp toktsütsü ashi aser tanü senden ayonga amen, ta Yephthomi-isa ashi.

"April 2024 nung Ato Kilonser menden nungi anentsüba atema tayang küpzüka Kitovi-i iba mapa inyak. Kitovi-i iba mapa inyaktsü atema nisung kar nem süpokrem agütsü" ta Deputy Commander-in-Chief, Lt. Gen. Aheto Chophy-ia ashi.

Khehoyi camp nung armoury nungi prangpong 60-70 shi aser

security duty nung alir ket nungi 17 auya ta pai ashi.

"Iba ama atalokaka GPRN/NSCN (U)-i Naga nung tarutsü atema rangloker putepshitsü mulunga lir aser nungdak süra talila awaloka inyaktsü" ta Alezo Venuh-i ashi.

Forum for Naga Reconciliation (FNR)-i tesüiba nung Naga nung tsünga azütokshitep anendaktsütsü atema kanga meranga inyakogo ta Kilonser C Singson-i ashi.

"Khehoyi camp atsünga agiba ya Kitovi'er telok atema takok ka ama züngshir iba ya tamagitsü politics inyakba asütsü. Civil society aser kin hohotemi putepshiba mapa nung shilem tuluba agitsüla. Kitovi-i Khehoyi atsünga agiba ajanga GPRN/NSCN tembanger ta masü saka onok maneni sorkar ka ama ketdangsüa aotsü" ta paisa metetdaksü.

"Yimjung ali nung dang asenoki aginüba tongtettsü. Asenoki tematiba ta asütsü tebilemba yur inyakasangshira teyari kecha mangutsü anungji Naga yimten telok balala lennirtemi nübortem taginüba angatetsüla aser külemi longjemtsüla" ta Singson-isa ashi.

Senden nung MCL, ACL, NPAC, council of kilonsers, tatars, HoDs, Naga Army, regions aser sub-regions 22 ajaki Neokpao Konyak aser Alezo Venuh lenisüba kübok GPRN/NSCN (U) nung adentsü bangjemtepogo.

Parnokisa Collective Leadership dang telemtetba magi tashi yimjung maparen inyaka aotsü tashi agütsüogo.

## SIDBI-i BAN den PROMO atema MoU nung sign sütep

**Dimapur, April 1, 2025 (TYO):** Small Industries Development Bank of India (SIDBI)-i Business Association of Nagas (BAN) den Memorandum of Understanding (MoU) ka nung sign sütepogo.

Iba MoU ya Programme for Capacity Building of Business Member Organizations (PROMO) Scheme kübok agitepogo.

Nagaland nung MSME ecosystem ajungkettsü aser renlokdaaktsütsü atema aser talisa BAN züngsemtem capacity building aser improved access atema iba tesentaktep yangluogo. BAN President Mongkum

Jamir aser General Manager, Guwahati Region, SIDBI Bhanu Prakash Verma nati MoU nung sign sütep.

SIDBI ajanga senotsü teyari agüja, green initiatives ajungketa, capacity building nung yaritepa, technical teyari agüja aser policy advocacy nung shilem agia MSME sector tashi itdaksür.

SIDBI ya Nagaland nung 1990 nungi inyakasangshia arur aser mezüngbo parnoki promotional aser developmental activities nung temulung agütsü.

SIDBI-i skill training programs agiba den common

facility centres amenoka aru. Ajisüaka tesüiba kum ana tsünga SIDBI-i Nagaland nung MSMEs nem direct financial assistance agüja arur.

SIDBI-i Nagaland sorkar den yaritepa SIDBI Cluster Development Fund (SCDF) kübok MSME-linked projects asoshi senotsü agütsür. Iba ya NABARD Rural Infrastructure Development Fund (RIDF) sülen inyaker.

Iba MoU ajanga SIDBI aser BAN tsünga entrepreneurs tashi itdaksütsü tenangzüka agishiogo.



## Hope Channel Dimapur indang Shelter Home ka semzükogo



**Dimapur, Rongchii/April 01 (TYO):** Hope Channel Dimapur ajanga "Manna for a Soul" inyakyim kübok IHSDP Complex, Netaji Colony, Dimapur nung April 1, 2025 nü Shelter Home for Beggars and Homeless semzükogo.

Iba sentong nung Reshimelna Longchari menden liasü aser Prof. Dr. Darlando Khathing, Pro-Chancellor, North East Christian University ajanga sarasadema liasü.

Tiakala Amri, Founder, Hope Channel ajanga tayongzükba o jembidang, iba tesem ya temeim aser arok khuret angateta inyakba temaitsü lir ta ashi.

Hope Channel ya Ebenezer Society kübok 2019 nung tenzük aser mezüngbu timtem nung aliba tetsür nem jenokdak tesem agüja liasü, saka Nagaland nung teyari tali nüngdakba ajiteta meilongi talidak ki makar tema yari tenzük, ta lai ashi.

Kija, arogo aser NGOs temi yaritepba ajanga iba maparen takok ngua inyaktet, ta lai ashi aser "Manna for a Soul" ya chiyongsü aser jenokdak ki agütsüba kisüng masü saka teyari nüngdaka alir nem teimla tanaben agütsüba aser pei takum jenjang angatetdaksüba lir, ta rateta ashi.

Lai nüburtem dang terenlokji rongsen agi masadangi tajemzükba jenjang nung alirtem koma ajungketer ta asadangtsü ayongzükla liasü.

Iba sentong nung tongti

tesemdanger ka ama Nagaland Angh La Ganesan-i jembidang, iba sentong ajanga mapa tajung inyakba indang lemsatet aser iba shelter ya jenokdak tesem ka kisüng masü saka nisung takum nung teimla tanaben agütsüba tsütsü mera ka lir, ta ashi.

Makamait ya mapa tamajung ka masü, saka makamaiter senzuka yutsüba ya mapa tamajung inyakba den sako lir, anungji teyari maliba ajanga meshitsüyaba aser pei ajangzüksü mechi nübur mulung mashileni anisaba bendangtsüla, ta pai ashi.

Angh Ganesan-i Bombay Prevention of Begging Act, 1959 athishia liasü, koba ajanga Delhi, Maharashtra, Karnataka aser West Bengal densema state ishika nung mishitsüyatsü memelar, anungi ketdangtsür temi meshitsüyar tem aputsü aser rehabilitation homes nung ayutsü melar.

Nagaland nunga iba mesükba mera agütsü imlar, kechiaser iba tebilemtsü koktettsü asoshi iba ama ozüng tem temeim agi mapa kuma inyaksü nüngdaker, ta pai ashi.

Hope Channel indang "Manna for a Soul" sentong ya Nagaland nung mezüngpur mera ka lir, koba agi chiyongsü aser anisüngzükdak tesem agütsüba kisüng masü saka talidak ki makar nem education, vocational training aser maongka agütsütsü nükjidong

lir.

Iba inyakyim tejangraba ya rehabilitation ajanga Nagaland nung meshitsüyar mali kumdaksütsü lir.

Angh Ganesan-i kija, shishilempar aser reju balala dang iba mission nung shilem tajung agütsü ayongzük aser sorkar kisügi meshitsüyar tebilemtsü mesamatsütetstü, ta ashi.

Pai civil society organisation aser tamangba yimsü nung amekdaka aliba rejutem dang lungjemer iba tebilemtsü asoshi inyaksü aser temeim agi mapa inyaksü ayongzükla liasü.

Hope Channel ajanga bendanga agütsür inyakba asoshi tenüngsang agüja nisung ajak akumtsüboa alitsü asoshi külemi inyaksü züngzüktepa liasü.

Iba tesem semzükba ya Dimapur nung talidak ki makar aser meshitsüyaba tebilemtsü asoshi tongtipang mera ka alitsü.

Rev. Lipokinba Ao, Secretary, Nagaland Mission Movement ajanga iba ki meshiteta sarasademtsü, DUCCF tir Zasivikho Zakiesato, Naga Women Hoho tir Nino Kire nungeria o tatsütsü jembia liasü.

Ebenezer Orphanage Home ajanga temeja ken ka aten aser Pastor K. Benjamin Sumi, Dimapur Sumi Baptist Church ajanga sarasadema sentong tembang.

## RCFSL ajanga Nagaland Angh ajuru



**Dimapur, Rongchii/April 01 (TYO):** Rengma Cultural and Film Society ajanga March 31, 2025 nü Police Complex, Chümoukedima nung Nagaland Angh La Ganesan ajurua parnoki inyaksü aliba project, "A Documentary on Rengma History, Culture, and Tradition" indang jembia liasü.

RCFSL tir A. Shyerhunlo Lorin-i Nagaland Angh den

Rengma Cultural and Films Society aser yangji züngsemtem indang metetpelaba mapang agia liasü.

Iba sülen Aga Rengma ajanga iba documentary atema osang tejangja agütsü aser literature aser motion pictures ajanga sobaliba wazüka ayutsü tongtipang lir ta ashi.

Maneni RCFSL ajanga

taoba mapang indigenous art aser süng-long noksatem amshia Raj Bhavan Kohima tebour jungdaksüba amala taoba mapang inyakba indanga parnoki Angh dang ashi.

Naga nunger sobaliba wazüka ayuba nung RCFSL ajanga inyakba atema Angh Ganesan-i tenüngsang agütsü aser akokba lenmang nung yaritepsü ta ashi.

## EastDimapurTownCouncilajangametetdaksür


**Dimapur, Rongchii/April 01 (TYO):** East Dimapur Town Council (EDTC) ajanga nüburtem, business establishment aser advertising agencies ajunga dang par jurisdiction nung hoardings, banners, posters densema advertisement mashi inoktsü atema EDTC office nungi jelia temelaba meshitsü metetdaksüogo.

Iba ozüng ya Nagaland

Municipal Act, 2023 kübok mapa kuma inyaker aser temelaba makai advertisements inokra osang magütsü indoktsütsü aser aibelener nem temerenshi agütsütsü.

Nüburtem dang iba totuyuba sülen anidaksü ayongzük aser temelaba agütsü mesüra asüngdangyatsü asoshi EDTC Office semdangtsü akok, ta sangdong ajanga ashi.

## Dimapur Councillors temi mürekmeju mapa inyaker



**Dimapur, Rongchii/April 01 (TYO):** Dimapur Municipal Council (DMC) indang Councillors temi kilentsü aoba lenmang mürekba maparen anir inyakba metangdangi Ward No. 5 nungi DMC Councillor Kuhoi Zhimo, Ward No. 22 nungi Kivikali Yephthomi aser Ward No. 4 nungi Hemlu Gongmei nungeri April 1, 2025 nü pei ward nung kiletzü atsüngtena aliba müreka senzua liasü.

Anasatapa aser kilentzü aoba lenmangtem sendaktepa lir asünung, tzü junga yimdaksütsü mechi iba maparen külemi inyak.

Meyi mapang tonga arur asünungji, Councillors temi tzü yimzuka moi atsüngtenba aser

iba dak sendakba timtem nungi kumzüksü asoshi temulung tali agütsür.

Küm 20 sülen taküm municipal elections agiba ajanga item maparen ya inyaker, aser lenirtem kübok terenlok tenük agi ajitetsü nübur temila lir.

Iba inyakyim nung GBs, chairmen aser nüburtemi yaritepba atema Councillor temi pelaba lemsatapa liasü aser ano kilentzü aoba lenmang mürekba maparen nung DMC ajanga teyari agütsüba aoshi parnokia pelaba lemsatet.

Ano Ward No. 5 kübok Old Overbridge Colony nung April 2, 2025 anepdang nungi tenzuka mürekmeju sentong ayongzüksü.

## NPCC-i Konyak, Chang aser Phom nunger dangi benjong salem abener

**Dimapur, Rongchii/April 01 (TYO):** Konyak, Chang aser Phom nunger dangi pei kin temeja benjong salem abener, ta Nagaland Pradesh Congress Committee (NPCC) sangdong ka ajanga ashi.

Konyak nunger dangi tepela Aoleang benjong salem abener. Iba benjong ajanga nenok dangi yimchiyimjung, tepela aser telungjem bener arujangma.

Chang kin dangi Kundaglung benjong salem abener. Iba temeshi benjong ajanga tesendaktep tali akangshia arok terebok aser tesunep asoshi

ajungmesotsü imlar.

Phom Monyu nung Phom nunger dangi iba tepela benjongmung salem abener. Iba bejong ya tasen kumshiba, tenüngsang agütsüba aser tepela lemsatetpba benjong ka südakjang, ta NPCC sangdong ajanga ashi.

Benjongbentsü ya asen sobaliba aser telungjem lepa reprangba mapang lir. Asenoki item benjong amungdang asenoki Nagaland nung tesunep, terenlok alitsü asoshi maneni inyakti, ta NPCC sangdong ajangasa ashi.



## India-i teyari oset tone 400 Myanmar dangi yok



**New Delhi, Rongchii/April 1 (Agencies):** India-i Mongolbarnü warship ka nung teyari oset tone 400 bener menoknok agi kongshir aliba Myanmar-i yokogo. Myanmar nung India nunger teküzmükertemi menoknok agi kanga mejungi kongshir aliba tesemtem nung taküm alirtem kümzüksü atema aritepa inyakdar.

Myanmar nung taoba Hokolbarnü 7.7-magnitude menoknok ka anoka nisung 2000 dak tema tepsetba den nisung 4000 shi yiruba sülen India sorkari teyari agütsütsü atema benokba operation Brahma ya Myanmar yaritsü atema linük balalai jenjang agiba rongnung tulutiba ka kümogo. Indian Army nungi mongintemi achaayangba field hospital ka Mandalay nung airport tejenba nung amendaker

inyaksangshidar. National Disaster Response Force (NDRF) nungi züngsem 80 oa Mandalay kübok tesem balala nung taküm alirtem kümzüksü meranga inyakdar.

Indian Navy indang amphibious warfare vessel, INS Ghariyal Mongolbarnü Vishakhapatnam port nungi chiyongtsü balala tone 442 bener apusoago. Indian Air Force (IAF) indang C-130 transport tayimtsü ka Mongolbar anepdang humanitarian aid, jang aser chiyongtsü balala tone 16 bener Delhi nungi apusoago.

Ano chiyongtsü, mozü aser süki densema teyari oset tone 30, India indang warship anati Mongolbarnü Myanmar nung ketdangsür ket tongtsüogo.

Hombarnü warships INS Satpura aser INS Savitri na

teyari oset tone 50 bener Yangon tonga oa liasü.

Hombarnü Mandalay nung menoknok agi konshir aliba tesemtem tonga aoba sülen Indian search and rescue personnel temi taküm alir bushiba mapang tongtibang teyari agütsüogo, ta ketdangsürtemi ashi.

March 29 nung India mezüngbuba teyari oset tone 15 IAF tayimtsü ka nung bener Yangon-i yoka liasü.

March 29 nüsa, personnel 120 shi densema army field hospital ka aser NDRF search and rescue team züngsem 80 den hadir tone 85, C-130 tayimtsü ana aser C-17 tayimtsü ana nung bener yoka liasü. Menoknok agi kongshiba sülen iba tayimtsü ana ya teyari bener Naypyitaw atongba mezüngbuba tayimtsü liasü.

## TNsorkari tebendang makai scheme tem benoker: CM

**Chennai, Rongchii/April 1 (Agencies):** Tamil Nadu sorkari party dak rangloker bendanga inyaksangshi masür aser terenlok maparen ajak benoka inyakdar aser political party balala nungi MLA temi benokba onüktem, senotsü tsütsü takoktsü alibatem tashi agizüka inyakdar, ta Chief Minister M K Stalin-i Mongolbarnü ashi.

Assembly House nung opposition AIADMK-i sorkar aitsüba dak sendakba nung CM-i ashiba agi, MLA temi benokba terenlok mapatem rongnung AIADMK MLA temi benokba densema lir aser tebendang kecha makai benoka inyakdar.

"Ner party dak sendakba nung onoki nenok züngsem Dr C Vijayabaskar nungi proposals meshi saka pai par constituency nung tinyaktsü aliba mapatem indang list magütsü," ta Stalin-i ashi. Opposition AIADMK lenir Edappadi K Palaniswami-i ken o ashishiba mapang CM-i iba telangzüba agüja liasü.

"Senotsü dak ajemdaker aser party mebendangi legislator tem takhangba dak ajemdaker mapatem ajak benoka inyakdar," ta Chief Minister-i ashiba den pai ita ana

nung khen mapa ajak lepa reprangshidar, ta shisem.

House nung Palaniswami-i ashiba agi, Ungal Thoguthiyil Mudhalamaichar kübok züngsemtemi benokba mapatem senotsü mali ta shia kecha masadangi dang magizüki liasü.

"School ka yanglutsü atema mepeshiba den magizük," ta opposition lenir yagi ashi.

Iba dak sendakba nung CM-i ashiba agi, school infrastructure ajungkettsü atema school education department nem nonglokja lir.

Kasa mapang nung DMK legislator Anbazhagan-i benokba onük dak sendakba nung Stalin-i, Tiruchirappalli nung sen crore 290 intoka yanglua aliba library ya taoba Chief Minister Kamaraj tenüng nung jatsütsü.

Paisa, Coimbatore nung library ya rationalist lenir 'Periyar' tenüng nung jatsütsü ta sangdonger liasü. "Tiruchirappalli nung yanglua aliba library ya Kamaraj tenüng nung jatsütsü tim ta bilemer, kechiyong pai Tamil Nadu nung yimtsüng ajak nung school tenzüksü aser school tanurtem nem mid-day meals agütsü," ta Chief Minister-i ashi.

## China aser India natesendaktep akangshitsüla: Xi Jinping

**New Delhi, Rongchii/April (Agencies):** China aser India na tesendaktep ya "Dragon-Elephant tango," ama asütsüla, koba linük ana indang emblematic shiruru tsüngsang ka asütsü, ta China tir Xi Jinping-i India tir Droupadi Murmu dang Mongolbarnü ashi. Linük ana bilateral tesendaktep tenzüker küm 75 ajunga anogo kati ka nem tenüngsang agütsütepba mapang Xi-i iba olen lemsatepa liasü.

Xi-isa, linük ana tali sendaktepa inyaksangshitsüla ta shiogo, ta Reuters-i ashi.

Himalayas tenemtsüng nung 2020 küm linük ana tsüngda arrtsü nung mangatettep adokba sülen tesendaktep mejungi kümer aliba tang tajungba akümba sülen tir ana tsüngda tenüngsang agütsütepba osang lemsatepogo.

Xi Jinping aser Murmu na dak alia China Premier Li Qiang aser Ato Kilonser Narendra Modi nata tenüngsang agütsütepba osang lemsatepogo.

China foreign ministry otongdar Guo Jiakun-i osangbenertem den sensaksemba mapang, linük anaprongla ya civilization kanga tejen lir aser tang alima nung kanga kara renloka aoba linük ana lir, ta ashi

Paisa, linük ana tsüngda tesendaktep ajanga ajak ajangzüka kuli lir ta ashiba den tarutsü asoshi linük anaprongla

atema partnership ya tajungtiba asütsü, ta ashi.

Guo-i ashiba agi, linük anaprongla lenirtem lenisüba nung lenla balala nung tesendaktep akangshitsü atema China bendanga agütsür lir.

Paisa, taoba küm BRICS summit mapang Modi aser Xi na Kazan, Russia nung ajurutepba koda tongtibang liasü iba indang lephsia jembi. Iba ajanga bilateral tesendaktep asoshi lenmang lapoka liasü.

Linük anapronglai lenirtemi tetuyuba agütsüba takok tashi benoka inyakdar aser tajangzüker ka-a longjemer inyakdar.

Guo-i, arrtsü yimjung nung toktsütsü koda tongtibang indang lemsatepba den international ken o tem nung tongtepratep akangshitsü aser mapang talangka asoshi Indo-Chinese tesendaktep terenlok atema inyaksüla, ta ashi.

Modi aser Xi na taoba küm ajurutepba sülen linük ana tsüngda temaba jenjang nung sensaksem balala ka arudar, kong arrtsü atema sensaksemba aser Foreign Secretary Vikram Misri-i Beijing semdangba densema lir.

March 25 nü linük ana tsüngda Beijing nung diplomatic sensaksem kaogo, kong arrtsü tajungba achaayangtsü aser trans-border ayong aser Kailash Mansarovar Yatra densema arrtsü adena tesendaktep asoshi sensaksem densema liasü.

## Shah-i 2026 küm tashi nungbo Naxalism samatsütsü nangzük



**New Delhi, Rongchii/April 1 (Agencies):** Union home minister Amit Shah-i Mongolbarnü, Modi sorkari nungi Naxalism raktoktsü ta tenangzüka agütsüogo. Paisa, Left-Wing Extremism agi district 12 kongshir liasü saka tang trok dang kümogo, ta ashi.

"Naxal-free Bharat ka yangertsü atema tanü linüki alizüng tasen ka tongteta Left-Wing Extremism agi district 12 kongshir aliba tangbo trok dang kümogo. Modi sorkari Naxalism anema jenjang tesashi agia Sashakt, Surakshit aser Samridh Bharat ka yangerdar," ta Shah-i social media nung sangdong ka ajanga metetdaksü.

Shah-isa, iba takok ya PM Modi-i "Sashakt, Surakshit & Samridh Bharat" yangertsü

atema nükla aser temulungtetba aliba ajanga ajangzüktetogo, ta ashi.

Union home minister-i ashiba agi, NDA sorkari Naxalism tembangdaksütsü atema jenjang tesashi agitsü aser lenla ajak nung terenlok asoshi tanen makai inyaktsü tenangzüka agütsü.

Union home ministry data ajanga, Left-Wing Extremism (LWE) agi kongshir aliba district tem ya Naxal inakyim aser azütokshi maneni benoka inyaksangshia alibatem district tem dang ajar ta shia lir.

LWE agi kongshir aliba district tem ya ano 'most-affected districts,' aser 'districts of concern,' ta shilem ana küma lemsar lir.

Tesüsabuba asadangba mapang district 12 LWE agi kanga mejungi kongshir liasü.

Official record ajanga ashiba agi, 2015 küm iba amala mesükba districts 35, 2018 küm 30 aser 2021 küm 25 liasü.

Amit Shah-i April 4 aser 5 nü Chhattisgarh semdanga state nung anti-Naxal operations inakyim asadangtsü. Shah-isa, April 7 aser 8 nü Jammu and Kashmir semdanga security jenjang asadangtsü imlar, ta PTI sangdong ka ajanga metetdaksü.

Chhattisgarh semdangba mapang Shah lenisüba nung temaba jenjang nung senden ka amentsü aser tang benoka inyaka aliba maparentem asadangtsü, ta source-i ashi.

Home minister-i 2026 küm March 31 nü tashi nungbo linük nungi Naxalism raktoktsü nükjidong yuogo. Pai Maoists tem dang bendanga agütsütsü atema aiben mepeshia arudar.





## TIR YIMYIM YIMOBILEM (EDITORIAL)

DIMAPUR WEDNESDAY, APRIL (RONGCHII) 02, 2025

### RSS-BJP akangshiteper

- P Tiamongba Aier

**N**arendra Modi-i Prime Minister ka ama RSS headquarters mezüנג semdangba ajanga BJP aser parnok nem shisatsü agütsür- RSS tsüנגda tesentaktep junga lir ama sayur. Iba mapang RSS volunteers-i wadang balala nung bendanga agüja inyakba atema PM Modi-i salute agüja liasü aser iba ya Haryana, Maharashtra o Delhi Assembly elections nung BJP-i takok tulu anguba atema tenüנגsang agütsüba asütsü. State asem nung RSS züנגsemtemi mapa tulu inyaka liasü aser parnoki voters anidenba ajanga BJP-i takok tulu angu. 2024 Lok Sabha elections nung BJP-i bilemba ama takok manguba sülen RSS tanishir Mohan Bhagwat-i olen kar jembiba ajanga parnok BJP den tesentaktep mejungi akümer asü ta terataba ka lia aruogo. PM Modi-i RSS headquarters semdangba aser RSS tenüנג asangba ajanga sorkar ketdangsubaren aser party madak Sangh Parivar-i shilem tuluba agitsü ta angateter. BJP national president Jagat Prakash Nadda melentsü atema tang maparen inyakba mapang ka lir aser taruba president ji Sangh lennir ka shim nunga maoksatsü. March 2017 nung Uttar Pradesh Assembly election agidang 'demonitisation' onük ajanga BJP-i tamakok angutsü ta nisung ajaki imlaa liasü. Ajisüaka, BJP-i takok tulu angu aser Prime Minister Narendra Modi o Home Minister Amit Shah na den tesentaktep tajung aliba Manoj Sinha Chief Minister inyaksü shimtsü ta bilema liasü. Saka Narendra Modi-i ajak aoksadakja Lok Sabha MP kümsük pungubenbuba inyaker Yogi Adityanath shima liasü. Modi-i osangbener ka dang iba ya teti agia aruba election ka masü anungji ni akhi ama nisung meshim ta ashi. March 30, 2025 nü PM Modi-i Nagpur nung RSS headquarters semdang. Iba ya Prime Minister inyaka arurtem rongnung RSS headquarters semdang pa tanabuba lir. Taoba PM Atal Bihari Vajpayee-i 2000 nung RSS headquarters semdanga liasü. Modi-i RSS headquarters semdangba ya parnok tsüנגda tesentaktep akangshitepba ama ajiteter. RSS-i parnok ya Hindutva cultural organization ka ama dang sayur aser political party ka makümtsü ta tenangzükbaga agia lir, ajisüaka parnoki BJP aser tesüiba nung Akhil Bharatiya Jana Sangh pusema arur aser India ya Hindu Rashtra kümdaktsütsü nükjidong nung inyaksangshia arur. PM Modi-i Centre nung teloktep sorkar ketdangsüa aotsü atema parnok den yaritepba teloktem dak metaloka lir anungji BJP-i parnok akangshitsü atema RSS dak teyari nüנגdaker. Ajisüaka iba tesentaktep ajanga Punjab, Kerala aser West Bengal assembly elections nung BJP-i tetendangba aika ajurutsü ama bilemer. February 8, 2025 tashi nung BJP-i aniba State 19 aser Union Territory 2 nung NDA sorkartem lir. Külen State 8 aser union Territory 1 nung INDIA bloc sorkartem lir. Mizoram state nung dang NDA aser INDIA Bloc nung madenba party ZPM-i sorkar yimsü asür. BJP-i taruba assembly elections agitsü aliba state tem nung voters anidentsü atema RSS den tesentaktep akangshir asütsü akok kechiyong West Bengal nungbo parnoki yaküm nungi Hindu-Muslim telemsa yur politics inyaka arur. Anungji RSS nükjidong Hindu Rashtra matalokdaktsütsü atema INDIA Bloc tashi itshitsüla aser parnok sasep nung mepetmesü alibatem angatetteper tashitait Opposition ka akümtsü merangtsüla kechiyong tanü India kübok state balala reprangdangra RSS tebilemba aser taginüba ama dang sorkartem ketdangsüa aruba angur.

## OLEMSABANG

### NÜBURTEMI PEI TEMEDEN TASÜ-ITA JEMBITSÜLA ASER OLA ADOKTSÜLA

~ L.Kika Pongener.

(Yashi adok nungi...)

Linük nung terenlok mapa kobasa sudir suaka, nübur ajangzüksü atema dang inyaker asünung, sorkar-i nübur den amaalitepa inyaksüla, aser akokba tashi yimsüsür o nübur na tsüנגda kati ka akümtsüba lenji-i arutepa angatettepa inyaksü merangtsüla. Aji oda, mapang kar nung sorkar-i nübur temulong masütsüsa metokmeperi kar inyakra, akok tashi nüburtemi nungsen metsübui indang-indanga metongshitsütsüla, kechiyong ibaji memetongshi-i toktsüra asen lima aser asen nübursa akoksatsü. Anungji tim mapa nungpo sorkar anema suaka nübur ajaki külemi longjemer tasü-ita ola adoktsüla.

Ano asen madak yimsüsür aser sorkar tenzükertemi khen-khenbo aibelena inyaksemtsü akok, iba ama atalokdang nüburtemi yimsüsür aser sorkar tenzükerji tenung-tetshia tenung-sena jembitsüsa akümer. Kechiyong yimsüsür shiba sudir suang pa/la-ji nübur tenzüksü atema nüburi shimtetba, yongji pa tenung-sena jembitsübaji tim dang. Tatishitsü agi....Train accident ka ataloka nisung aika taküm samara....Railway Minister-i 'Moral Ground' nung nübur dang tatok meshir. Aji oda, sorkar Department mapatong kar nung nübur mulong masütsüsa aibelena kar inyakra....Minister, Advisor, MLA mesura Bereaucrat shiba 'Incharge' sudir pa/la tenung tuteta tetshitsüsa akümer.... Pa/la tenung tetshibaji pa/la nija (Personal) anema aser kin (Tribe) anema masü, saka pai/lai bena aliba Ministry/Department inyakyim meshitakba anema ola adokerba dang ta nübur ajaki angatettsüla. Iba ama tensa ajurudang inyakyim meshitakbaji metongshitsütsü melena nüburtemi tepo kümtepa ora....aibelena inyaksübaji asenok nüburi ajungshir ama asütsü. Anungji asenok tejakleni aoba kin ka ama tangatetba kanga tesadem asütsüla aser ken o tila-teri ajak nung tepo kümtepa shisatsü malitsüla.

Asen lima nung sorkar aser loktiliba ajunga ya Democracy yayim agi yimsü asür aser anir. Yongji, sorkar aser loktiliba ajungaji yimsüsür aser lennir kija meyong masü nübur meyong lir. Anungji sorkar aser loktiliba ajungtsü asoshi pei tebilemba lemsateptsü aser tim masüba nungpo yabo tim masüa ta jembitsü nübur ajak temeden lir. Aji oda, mapang kar nung yimsüsürtemi nübur mulong masütsüsa tim masüba olen kar jembira, mesura nübur hau ta mali küshi-küshi maparen kar inyakra, nüburtemi yabo tim masüa ta ola adoktsüla. Yimsüsür aser sorkar tenzükertemi aibelen dang nüburtemi ola madoki toktsüra, yimsüsür aser sorkar tenzükeri nübur aküm-metsübui küshi-küshi inyaksü aser asen limaji kibur maliba lima ka mesuka akümtsü. Ano kangasa tongtipang kaji, asenok nüburtemi aibelenbaji metongshitsütsü melena, pei kinunger, pei yimer aser pei kin apia tepo kümtepa ora....Ibajagi asen lima renloktsü melena rajang akümtsü aser telungi alutsü. Anungji tim masüba mapa nungpo sorkar aser yimsüsür anema suaka nübur ajunga külemi longjemer tasü-ita ola adoktsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Indonesia nung ketdangsür temi tekülem ki yanglutsü memulunger

**Surabaya, Rongchiii/April 01 (Agencies):** East Borneo Province, Indonesia nung arogo ka tekülem ki yanglutsü asoshi temelaba angutsü nüngdakba ajak liaka ketdangsür temi tekülem ki asütsü memulunger, ta osang ajanga ashir.

Sungai Keledang, Samarinda Seberang Sub-District nung Toraja Christian Church ya license permit atema nüngdakba maparen ajak temer liaka East Borneo Province yimtiba Samarinda nung Samarinda Ministry of Religious Affairs Office ajanga recommendation shiti agütsütsü memulunger, ta Indonesian Movement for All (Pergerakan Indonesia untuk Semua, PIS) ajanga ashii. Iba arogoi permit ya meshi tenzüker küm ter jungogo.

"Oh Tsüngrem... Asenoki tasakba kumdahtsü dang nüburtemi komasür külemtsü," ta PIS ajanga par website nung ashii. "Letter of recommendation agütsütsü memulungba atema Ministry of Religious Affairs

office ajanga ano kechi kuli agütsütsü? Tasü mait mapa amai angateter. Iba ama tim masüba mapa odangbo metoktsütsüla," ta PIS ajanga ashii.

Iba arogo ya yangji aliba ketdangsür temi mela aliba nisung 90 atema ID cards yanglutsü, application atema inyaktepdang küm ter jungogo aser taoba küm September ita yangji aliba Interfaith Forum nungi temelaba agüja liasü, ta PIS ajanga ashii.

Sorkar ketdangsürtem ta Muslim nunger telok balala tsübor, ta East Kalimantan Alliance for Advocacy for Freedom of Religion and Belief indang chairman Hendra Kusuma-i ashii.

"Parnok ya yangji nisung ishika ang tali tsübor, shirnoki arogo aliba magizükteter, saka state nung tamangba yimsü temeden agüja lir," ta Hendra-i ashii.

Indonesia nung küm aika ataloka aruba ama ketdangsürtem mapa melenshir, ta pai ashii.

"Onoki sendaktepa aliba telok ajak semdangogo, aser Ministry of Religious Affairs-a semdangogo, saka

parnoki sub-district head nem telemtetba agidaktsür. Iba tebilemtsü bentettsüsa atema party kata tasü ita mali," ta Hendra-i ashii.

Tekülem ki yanglutsü atema Samarinda Branch of the Interfaith Forum (Forum Kerja Sama Umat Beragama, mesüra FKUB) nungiatemelaba agütsüogo, koba tamangba yimsü balala ajanga kumtetba telok ka lir aser parnoki ki o jen yanglutsü temelaba agütsür, ta Hendra-i ashii.

"Onoki tekülem sentong agitsü atema tekülem ki ka yangluner dang. Pei mulungba yimsü agizüka tekülem kidang külemtsü asenok ajak temeden lir. Aser özüng nung aliba ama asen temeden agütsütsüla," ta iba arogo züngsem Elizabeth-i ashii.

Nisung ishikati tekülem ki yanglutsü nokdanger, kechiaser ketdangsür temi Ramadan mapang m a n g a t e t t e p madokdaktsüner, ta Ministry of Religious Affairs office nungi ketdangsür kati ashii.

"Onoki yangji timtem kecha maginer. Talisa Ramadan ita nung, kechiaser iba mapang

maginütsüsa tensa adokdaktsür, saka onoki magütsüner ta masü," ta ketdangsüri ashii.

Hendra-i ashiba agi, parnoki March 5 nü Samarinda Ministry of Religion Office semdang aser FKUB ajanga recommendation letter agütsür anogo 30 tsüngta Ministry of Religion yagi recommendation letter agütsütsüla sernung magütsü.

Iba sülen East Kalimantan Alliance for Advocacy for Freedom of Religion and Belief ajanga Samarinda municipal government dang mepishia liasü.

Tekülem ki yanglutsü nokdanger densema jenjang balala nung tim ketdangsürtem ajurutsü nangzüka lia ano tekülem ki tesem dangai belentsüba onük temai adok, koba Khristanpuri magizük.

"Tekülem ki tesem belentsüba nung mangatettep liasü aser onoki aji magizük. Tang aliba tesem nung Toraja Church kibur ta kulizüng lir," ta Hendra-i ashii.

State aser / mesüra

Samarinda ketdangsür temi tamangba yimsü balala sülen anodaker ajunga nem guarantees kasa magütsür, ta Jakarta nung amenoka aliba attorney Peter Selestinus-i ashii.

"Ibai 1945 Constitution indang Article 29 anema lir, kong state-i tamangba yimsü temeden agütsütsü shia lir aser nüburtem pei mulungba nung yimsü amshitsü mela lir," ta Selestinus-i ashii.

"Ajisüaka tia maka asen linük nung asen Constitution ajanga nübur ajunga nem mela aliba tashi aser temeden mamshidaktsür. Nüburtemi külemkejatsü tesem nüngdaker, saka aji tasak kumtsür. Yangi talisa Samarinda City Government ya nüburtem den ochishia malir aser parnoki constitution aser meimchir temeden nung aibelener," ta pai ashii.

Indonesia nung conservative Islamic character tali amshir aser kima yimdong nung sayutsünga senzüba arogotemi timtem ajuru, kechiaser Islamic extremist telok temi tenük yoker.

## TamangbayimsümechiIndianungtamangertemyimtsüngnungi aridok

**Bhubaneshwar, Rongchiii/ April 01 (Agencies):** India anüdoklen Odisha state kübok Hindu nunger timba aliba yimtsüng ka nung Khristan kibong anati tamangba yimsü melentsü memulungba yong parnok nem tzü ama facilities magütsü.

Kibong ana rongnung ka indang tekolakba Gangadhar Santa-i UCA News dang ashiba agi, Hindu nunger temi parnok indang electricity agizüktsüba aser yimdaklir amshiba tzübo nungi tzü magütsüba indang kibong anaprongi police nem osang agütsü. Saka police temi meyarí, ta pai ashii.

March 29 nü kibong ana nungi züngsem ti prong Siunaguda yimtsüng nung akhi mapang nungi liyonga aruba ki yutsü. Siunaguda ya Odisha nung Nabarangpur district kübok yimtsüng ka lir.

Iba yimtsüng ya state yimtiba Bhubaneswar nungi kilometre 550 shi pilar lir, kong Blessing Youth Mission (neo-Christian Church) nung züngsem Khristan kibong asem liasü.

Parnok ya iba yimtsüng nung Hindu nunger kibong 130 den külemi liasü.

Khristan kibong asem

nungi kabo kinunger tasü mang maremtsü ta yimdaklir temi nokdakba yong March ita tetenzüklen iba yimtsüng yutsür orr liasü.

Santa-i March 29 nü UCA News dang ashiba agi, parnok ya aluyimer lir saka parnok ali aser ki yutsütsüsa akum. Tanur tila anir par kibong ya iba yimtsüng nungi kilometre 40 shi oa ali.

Ano kibong ka parnok yimtsüng nungi kilometre 20 shi pilar yimtsüng kati ao.

Arishi küm 28 tain Santa-i ashiba agi, police temi Khristanpur meyariba kisüng masü saka parnok dang yimdakliri akhangba ama Hindu yimsü agizüktsü ang ajungshi.

"Onoki Hindu yimsü dangi meyiptsü memulung aser Yisu Khrista-i onok kumzüktsü ta onoki amanger," ta pai ashii.

Iba yimtsüng nung aliba Khristanpur nem housing assistance ama sorkar indang welfare schemes magütsür, ta Santa-i ashii.

Arr asatepba mapanga parnok alibo masai ali kibur indang kulizüng kakat samadaktsü. "Iba ama onok mezüngmeshia aser bensaa amshir," ta Santa-i ashii.

Odisha tesem balala

nung Hindu nunger telok temi Khristanpur mezüngmeshia amshir, ta Nabarangpur district n7ung Blessing Youth Mission ketdangsür Ajay Suna-i ashii.

"Yimtsüng nung sentong balala agidang Hindu nunger temi Khristanpur nokdanger, parnok nem sorkar indang documents magütsür, yimtsüng nung aliba dokan tem nungi aonsotsü malidaktsüi nokdanger. Ajakji parnok Khristanpur asüba ajanga lir," ta pai ashii.

A z ü d o k s h i b a , amokmerenba aser merenshiba indang osang agüjanga state ketdangsür aser police temi mera magiba ya kangasa tia maka, ta okatsür aser Odisha Lawyers Forum of Religious and Priests nung züngsem Father Ajay Kumar Singh-i ashii.

"Na ner yimtsüng nung liner na Hindu nunger akumtsüla ta tanü Hindu nunger tangatetba lir," ta Catholic priest of Cuttack-Bhubaneswar archdiocese ajanga ashii.

State nung taoba küm BJP sorkar kumtetba sülen Khristanpur anema mapa tamajung inyakba tali akumer, ta Singh-i ashii.

ANOGO ABEN TSÜNGREM DEN

KHRISTA ASEN TEKÜMZÜKER

*Kechiyong Tsüngremi alima odang meim nung pai pei ajaso chir agütsü, anungji shirisa pa dak amangdir mesamatsü, saka teti taküm akatsü. Yohan 3:16*

Nungtugu kaketshir aikati ashir tamangba yimsü ajak tajung aser ajak tamangba yimsüi Tsüngrem ka dangi anir. Anungji aikati pei pei tamangba yimsü dak tekümtet angutsü asoshi teimla ayur. Kari mapa tajung inyakba ajanga tekümtet angutsü bilemer, kari ochi mulung akaba ajanga tekümtet ngutetsü imlar aser kari süngyanglu tapu tapu külemba mesüra tenla tajungtiba agütsüba ajanga tekümtet taküm ajangzüktsü ta bilemer. Api.16:25 nung yamai ashir, "Nisung tsüngdang shitak mesükba lenmang ka lir, saka iba tatembangji tasüba lenmang."

Saka, asenok Khristan tamangertem asoshibo Lai o ajanga ashir Yisu Khristaji dang asen tekümpzüker aser pa ajanga dang asenok kotak lenmang leni anir. Pa senti taküm tenlaba ajanga alima menenpur ajak kümpzükogo. Anungji Pa majangi shinga Tebu dangi aotsü makok. Kechiyong Yohan 14:6 nung ashir, " Lenmang atangji aser Taküm ni lir. Ni ajanga mesüra shingaia kü Bu dangi marur."

Asen tekümpzüker Khrista dak alaka anüng kübok meimchir rongnung tangar tenüng shinga mali anungji, arung Pa dak ochishia aser mulung ajak agi amangdi. Amen.



**AO OSHI ANGAZÜKDAK:****TANÜ ANGAZÜKTSÜBA OJANG****Tembala**

(n) medemer tajung (close friend)

\* Ozü tembala dak temeim kanga lir.

**Tembang**

(v) maparen renema aruba, atem (conclude)

\* Mendenbubai tepela o shia senden tembang.

**OLONG PAITEP # 7110**

|    |    |  |    |  |   |    |   |    |    |
|----|----|--|----|--|---|----|---|----|----|
| 1  |    |  | 2  |  |   | 3  |   |    | 4  |
|    |    |  |    |  |   |    |   |    |    |
|    |    |  | 5  |  | 6 |    | 7 |    |    |
| 8  |    |  |    |  |   |    |   |    |    |
|    |    |  | 9  |  |   |    |   |    |    |
|    | 10 |  |    |  |   |    |   |    |    |
|    |    |  |    |  |   |    |   |    |    |
|    |    |  |    |  |   |    |   | 11 | 12 |
|    |    |  | 13 |  |   | 14 |   |    |    |
|    |    |  |    |  |   |    |   |    |    |
| 15 |    |  |    |  |   | 16 |   |    |    |

**TIPIEN**

1. Anenzükdak ki
3. Asür mangyimba
5. Temulung nung shisadang
8. T \_\_\_\_ lu
10. Takdang temalen
11. Tesa \_\_\_\_ a
13. Ajungbena temulungjang
15. Tejen lai nung tesayur
16. Tsüingsak-mopung

**LANGTSÜNGLEN**

1. Reprangdaksü
2. \_\_\_\_ ur
4. Kiojen yangludak
6. \_\_\_\_ ait
7. Nagaland nung ayong ka
9. Küm kasa purtem
10. Tetsüing tajemetdak
12. \_\_\_\_ adenshi
14. Tsünüsenbongtsü adokdak

**OLONG PAITEP # 7109 TELANGZÜBA****TIPIEN :**

1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem, 25. Süra.

**LANGTSÜNGLEN :**

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju,
21. Ano, 22. Onü, 23. Kua.

**Alokbai pomgmanga mesük mangdanga mesüker ka angu:****Alokba** : O Kibuba , Anüng nung temesüng sobutsü sobur yimzüba ya shirnok ?**Tenyar** : O Alokba , Onok ya Kodak tenyartem lir , Ena, Nai nenok Naga nunger aser Aor dang yamai shiangno,

1. Taküm tepiyong Tsüngrem tenzüksü nangzüker azüngba Laishirtem dang, nenok aika tasoba küm balaka aser school certificati nung züluba tasoba küm balaka ta zülua aliba jagi kü Arogo kangshir, anungji aji melenshiang ta shiang !
2. Ano Tsüngrem nem bendanga agütsür amangba purtemdang, parnok takdang telongbai yia sarasademba room nungji tayuba light tsükloka lir ta shiang, (light bill shidak agüjang )
3. Aser Arogo tenzükertertem dang, Tsüngremer Sen amshidang taila cash memo yanglutsü temerang ta shiang no! Kobi melii ni Arogopurtem dangi arutsü ta Kibubai ashir.

**Alokba** : O Kibuba !!!!**Lilir** : I. Kilang Ajem, Indisen, Dimapur.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Assam sorkari women entrepreneurship scheme tulutiba tenzüko****Guwahati, April 1, 2025**

**(Agencies):** Assam sorkari entrepreneurship support initiative tulutiba tenzüko aser iba dang 'Mukhya Mantri Mahila Udyamita Abhiyan' ta ajar.

Iba scheme ajanga tetsür lakh 30 nem senotsü teyari agüja parnok sasa mapa inyaka otettsü.

"Nari Shakti ajungkettsü atema sorkari mapa inyaker. Tetsürtem asoshi free schooling aser livelihood support nungi old-age pensions aser free food grains agütsür" ta Chief Minister Himanta Biswa Sarma-i ashi.

"Tanü onoki tetsütem aser jalatem temoatsü agia Mukhya Mantri Mahila Udyamita

Abhiyan tenzüko. Iba ajanga tetsürtem nem Rs 10,000 seed capital agütsütsü" ta pai ashi.

Iba scheme kübok tetsürtem nem mezügbuba küm nung Rs 10,000 seed capital agütsütsü, tanabubaküm Rs 25,000 (Rs 12,500 as a loan & Rs 12,500 as government support) aser tasembubaküm Rs 50,000 agütsütsü.

**Manipur nung PM-KISAN scheme atema FIR benok****Imphal, April 1, 2025**

**(Agencies):** Manipur nung PM-KISAN scheme mapa inyakba nung metokmeperi lir ta audit report ka ajanga putetogo.

State sorkari iba dak sendakba nung FIR ka benokogo ta Centre-i ashi.

"State aser Union Territory temi ineligible farmers nem agütsüba sen meyipa meshitsü tashi agütsüogo" ta Minister of State for Agriculture and Farmers Welfare Ramnath Thakur-i ashi.

"Manipur sorkar nungi osang aruba ajanga Accountant

General (AG) Audit Report nung tim masüba kar putetogo. Iba atema state sorkari FIR ka benokogo" ta Thakur-i Lok Sabha nung ashi.

PM-KISAN scheme ya February 2019 nung tenzüker aser central sector plan ka lir. Iba scheme ajanga cultivable land-holding farmers nem senotsü teyari agütsür.

Iba scheme kübok aluyimer nem kümshia Rs 6,000 agütsür aser iba ya Aadhaar-seeded bank accounts nung shilem asem lemsar enoktsür. Iba sen

ya Direct Benefit Transfer (DBT) mode ajanga yoker.

Centre-i iba scheme tenzükerba sülen nungi instalments 19 tashi nung Rs 3.68 lakh crore agütsüogo.

Mezüngbo state kar atema Aadhaar-seeding maliasü aser iba ya atema technological maparen aika tenzüko. Iba sülen Aadhaar-based payment aser e-KYC den land seeding asütsü mapa tenzüker.

Linük nung tesem balala nungi ineligible beneficiaries nungi Rs 416 crore ngutetogo.

**Kamakhyia Express train passenger 209 tashi Guwahati tongogo****Guwahati, April 1, 2025**

**(Agencies):** Bangalore-Kamakhyia AC Superfast Express nung mena alir Express passenger 209 tashi Kamakhyia railway station tongogo.

Odisha kübok Nergundi Station anasa iba train nung takdang kar lenmang nungi

lungpeta tuguba sülen March 31, 2025 ayaterm nung Guwahati tonga aru.

12551 Bangalore-Kamakhyia AC Superfast Express nung takdang 11 tashi lenmang nungi lungpeta tuguba lendong nung nisung ka asü aser 8 yiru.

Yirurtem rongnung Assam nungi nisung ana densema liasü saka tasübabo mali ta Chief Minister Himanta Biswa Sarma-i ashi.

Nisung anaji Udalguri nungi Willson Digal aser Baksa nungi Amiran Nisha na lir ta paisa ashi.



Arunachal Pradesh Women's Welfare Society (APWWS)-i Government Higher Secondary School, Kankar Nallah nem educational books 180 tashi tenla agütsüba angur. Law student aser animal activist Tade Yangfo-i APWWS nem kaketter mulungsoa agütsü aser pai iba ya Arunachal Helping Pets ajanga bendenba lir. Kaketter rongnung grades 1 nungi 12 tashi NCERT textbooks aser general knowledge books dena lir.



# Israel-i ano Lebanon yimtiba Beirut amak

**Beirut, Rongchii/April 1 (Agencies):** Hopta ka majung tsüngda Israel military-i Lebanon yimtiba Beirut maka nisung asem tepsetogo aser iba ajanga ita pezü tejakdang Hezbollah den ceasefire atema nangzükteper aliba amokmerener.

Beirut indang southern suburb Dahiyeh ya Mongolbarnü kecha tekümdangtsü magütsüi amak aser nisung tenet tashi yiruja liasü, ta Lebanese Ministry of Health-i metetdaksü.

Israel indang military-i sangdong ka ajanga ashiba agi, parnoki Hezbollah züngsem ka dak rangloker iba tesem amak, shibai Palestine nunger telok Hamas-i Israel nunger civilian tem amaktsü atema sentong yangluba teyari agüja arudar. Ajisüaka parnoki kuli kecha magütsü.

Ken o dak sendakba nung Hezbollah puri kecha telangzüba magütsü.

Lebanon tir Joseph Aoun-i iba tesem amakba aitsüogo aser iba ya par linük asoshi Israel tebilemba dak sendakba nung tekümdangtsü ka lir, ta ashi.

"Israel-i maneni onok anema jenjang agiba nokdangtsü atema onoki alima ajunga nung Lebanon tembartem anidena onok sovereignty pusemdaktsütsü nüngdaka kümogo," ta Aoun-i ashi.

Bomb pokloktsüba sülen Dahiyeh tesem nungi mokozü adokba video tem ajanga sayuogo.

Video tem ajangsa apartment building ka nung tekolakba floor asem raksar aliba aser ki temeket nung jana nongna agi garitem nembanger aliba sayuogo.

Al Jazeera osangbener Resul Serdar-i Beirut nungi ashiba agi, Dahiyeh nung teküzmükba maparen maneni benoka inyakdar, aser iba

lendong nung asürtem indang Israel aser Lebanon napronglai kecha osang agüja mali.

Serdar-i ashiba agi, Mongolbarnü iba tesem amakba ya Lebanon sorkar asoshi kanga shisabulutsüka lir, kechiyong November ita Hezbollah den ceasefire atema nangzüktepba sülen Israel-i mezüngbuba Beirut maker anogo asem dang lir parnoki tanaben Beirut suburb Dahiyeh ya makogo.

Küm ka raraba sülen iba tenangzüktepba ya France aser United States nati teyari agüja yanglu aser tenangzüktepba kübok Israel nunger sepaitem southern Lebanon nungi atsüngintsü nangzükteper lir.

Tenangzüktepba nungsa Hezbollahsepaitema south nung Litani ayonga aser United Nations-i khien atema yanglua aliba arrtsü; Blue Line adena atsüngintsüla aser Lebanon sepai iba tesemi yoktsü nangzüktepa liasü.

Ajisüaka telok anapronglai nangzüktepba ama minyakba atema kati ka aitsütepa arudar.

Israel-i January ita sepaitem anintsü tenangzükba agütsü saka atakzükja aliba anogo sepaitem manin aser south Lebanon nung tesem ishika maneni atsünger lir. Parnokisa Hezbollah pur aser parnok indang hadirtem amaker ta shia anogshia amai Lebanon maka arudar.

Military-i Hokolbarnü Beirut amak aser ashiba agi, Lebanon nungi Israel dak rocket khaloktsüba atema telangzüba agüja parnoki amaker.

Ajisüaka Hezbollah puri parnoki rocket mekhaloktsü ta shiogo.

Al Jazeera osangbener Serdar-i ashiba agi, Hokolbarnü aser Mongolbarnü Israel-i Lebanon amakba ya onük balala dak ajemdaker makogo.

"Israel-i ashiba agi, March

28 nü Beirut amakba ya Lebanon nung rocket khaloktsüba atema telangzüba agütsüba lir, saka tangbo rocket kecha mekhaloktsü," ta pai ashi.

"Anungji tang tasüngdangba kaji, Israel-i linük yimtiba ya maneni amaktsü asü masü," ta pi asüngdang. "Beirut nung aliba nüburtem kanga shisabuluteper. Parnoki ashiba agi idaki yimjung benoker aliba ya kodang raksajar memetet aser tiliteri kar ajanga ceasefire ya chirepa ano rara tanga ka tenzükshitsü akok."

Hezbollah lenir Sheikh Naim Qassem-i Honibarnü, Israel-i Lebanon maneni makra aser Lebanon sorkari parnok nokdangtsü atema jenjang magira parnoki tanga lenmang ka bushitsü ta tekümdangtsü metetdaksüogo.

Kasa mapang nung Israel-i Lebanon maneni amakba atema ken o asadangertemi US dak tai tongloktsüogo.

Institute for Policy Studies nung fellow Phyllis Bennis-i Al Jazeera dang ashiba agi, Lebanon dang masü saka Syria aser Palestine nungertem atsünger aliba tesemtem amaktsü atema Trump administration-i Israel nem temelaba agütsüogo.

"Trump administration-i parnoki Israel maitsütsü ta jangja jangja metetdaksüogo. Parnoki prangbong injang aser hdirtem yokba manentsü koba ajanga tesem balala maneni amaktsü tashi agütsür," ta Bennis-i Washington, DC nungi ashi.

Israel-i Lebanon nung ceasefire atema nangzükteper aliba anema jenjang agiogo, saka iba tenangzüktepba yangluba nung tongti shilem agir France aser US napronglai kecha tenokdangba magütsüi Israel nem iba tesem maktaktsüogo, ta laisa shisem.

## ALI DEN KI TAYAOKTSÜ LIR

Artang Ward, Mokokchung nung Nagaland Christian Residential Higher Secondary School anasa ali den atongtepba asüba longki ka dena tayoktsü lir.

Nüngdakba purtemi teküboklen agüja aliba number nung tongterateptsü akok.

# 8974857871

## PHOM UNION MOKOKCHUNG AJANGA SANGDONGER

Phom Union Mokokchung ajanga sangdong ka yamai ayimoktsür. Mokokchung Town kübok Phom nunger tangar kidang yaritepertem mesüra kidang lia School/College azünger/training agirtem/mapa balala inyakertem kwika lir, parnok ajak union nung tenüng züluoktsü atema 5th April, 2025 (Saturday) anogo 12:00 noon nung union Treasurer (Above Guest House, Alongmen Ward) ki bushia item agüja aliba nüngdakbatem (details) bener arutsü metetdaksür.

Tenüng (Name), Arishi küm (Age), Tebu & Yim Tenüng (F/ name & Village), Ki kibur tenüng/Yim/Address & contact No. Tanur noksa ana (2 photo), Registration Fee Rs. 200/-

Tenüng mezüluoki tarutsü nung timtem/lendong ajurura union-i khuret mabentsü. Iba sangdong dak alaka kibong shia dangi osang balaka meyoktsü, anungji ajaki ibai tongtibang ta angateta union den amaliteptsü mepishir.

Sd/-  
L. Nyamei Phom  
President/ 7005779432

Sd/-  
B. Chingba Phom  
G/Secretary/8413955254

## Nobel Peace Prize atema tepuokdak alisang Imran Khan nominate asü



Imran Khan

**Islamabad, Rongchii/April 01 (Agencies):** Taoba mapang Pakistan ato kilonser inyaka alisang Imran Khan-i human rights aser democratic values asoshi mapa tajung inyakba ajiteta Nobel Peace Prize asoshi nominate süogo.

Iba nomination osang ya Pakistan WorldAlliance (PWA) züngsem temi sangdong. PWA ya December ita tenzükba advocacy organisation ka lir aser Norwegian political party Partiet Sentrum den sendaktepa lir.

"Imran Khan, Pakistan indang taoba ato kilonser-i Pakistan nung nisung meimchir temeden aser democracy asoshi inyakba atema Nobel Peace Prize asoshi nominate asüba Partiet Sentrum tenüng nung pelashishia sangdonger," ta Deobarnü Partiet Sentrum ajanga X nung post asü.

Khan-i South Asia nung yimjung alitsü asoshi inyakba atema 2019 küm Nobel Peace Prize nomination ka ngua liasü.

Ajisüaka par linük nungbo Imran Khan-i ajungmesoa

azüdokshi aser rongrong adokdaksü ta Centre-i ashir.

Küm shia Norwegian Nobel Committee yagi ita ti agia nomination noklang aika asadanger aser tatem nung takoker ka shimer.

Khan, shibai Pakistan nung tang aliba opposition party Pakistan Tehreek-e-Insaf (PTI) tentet, pa 2023 küm August ita nungi tepuokdak alir.

January ita ketdangsür temi ochimashi aser mashi lenmang nung tashi amshiba atema Khan ya küm 14 tepuokdak ayutsü obendang agüja liasü.

Linük indang sempet ayokba, miim mapa temai adoktsüba aser kiyimba nung tim masü inyakba dak sendakba nung taoba mapang aija aliba ken o asem temaba court temi melenshitsü.

April 2022 nung no-confidence vote agitepba sülen Khan ya ato kilonser menden nungi agiena liasü, saka pai aibelen mapa meinyak ta tanü tashi nokdaker aser item ken o ajunga yimten tsütsü nungi benokba lir ta ashir.

## Myanmar menoknok nung asür nisung 2,700 jungogo

**Naypyidaw, Rongchii/April 01 (Agencies):** Myanmar menoknok lendong nung nisung asüba 2,719 jungogo aser 3,000 alemtsü akok ta ashir, aser tang tashi maneni nüburtem kumzükba maparen inyaktar.

Hokulbarnü menoknok magnitude 7.7 anokba ajanga nisung meyirijang aika yiru aser sama, anungji civil war agi raksatsür aliba linük nung teyari mapa inyaktsü tali benjadaktsür.

Myanmar mitkar lenir Min Aung Hlaing-i Mongulbarnü television ajanga jembidang, nisung 4,521 yiruogo aser nisung 441 samar bushir ta metetdaksü.

Rescue workers temi ki o jen chirepa aliba kaka aodang ano asü-amar tali akumtsü ta tsüboteper.

Mandalay densema tesashitiba kongshiba linüktem nung tang tashi tensa mazüokteti lir. Preschool ka chirepba nung tanur 50 aser

tesayur ana asü, ta United Nations Office for the Coordination of Humanitarian Affairs (OCHA) ajanga ashi.

Teyari agütsüba lokti tentet temi chiyongtsü, tzü aser mozü agi kanga anünger ta tekumtangtsü shiogo aser pei ki yutsür tesem balala nung prokshia aliba nisung meyirijang aika moabu nung mejanger.

"Menoknok nungi takum jenbuba sülen nüburtem ano "aftershocks' tsübor aser aonung parnok moabu nung kazür," ta International Rescue Committee (IRC) nung inyaker kati Mandalay nungi ashi.

Myanmar nung tang civil war aliba ying teyari agütsütsü merangba nung timtem ajurur.

Amnesty International ajanga mitkar tanishir dang menoknok lendong ajurua aliba tesem nung tenokdangba makai teyari agütsüdakjang ta shiogo. Iba ama lendong ajurur liaka mitkar temi tanem makai

tayimtsü amshia amaker, ta mitkar anemba telok temi aitsür.

Menoknok lendong nung asür bilemteta Myanmar nung Mongulbarnü minute ka süngjema liasü.

Kasa mapang Thailand nunga search team temi maneni Bangkok nung skyscraper chireper alidak inyaktar. Iba ki tulu chirepdak nisung takum alitsü teimla lir saka samar ta ashir, kechiaser menoknok anoker anogo pezü süyio.

"Iba ki telung nung nisung 70 shi lir aser sayatenya ajanga karbo takum alitsü imlar," ta volunteer rescue leader Bin Bunluerit-i ashi.

Tang tashinung iba ki chirepdak nisung 13 asüba jangjaogo aser tang tashi nisung 74 samar bushir. Thailand nung iba menoknok lendong nung asür nisung 20 lir, saka ketdangsür temi timba alitsü ta ashir.



## Barak FC-i mezüngbuba Nagaland Super League kokogo



**Dimapur, Rongchii/April 1 (TYO):** Mezüngbuba Nagaland Super League January 28 nungi tenzüka April 1 nü tashi kanga toktepbu asayaba sülen final asaya nung Barak FC-i Longtork FC goal 3-1 agi koka iba asayamung benogo.

Taküm iba asayamung nung ajak senteper team tenet Chumoukedima football stadium aser Indira Gandhi (IG) Stadium, Kohima nung asaya liasü.

Team ajunga melentepa league asayaba sülen Barak FC

pur mezüngbuba aser Nagaland United tanabuba jenjang nung tembang aser playoff asayaba sülen Barak o Longtork na final asaya liasü.

Ajaki kanga yongyatepa ataba sülen Mongolbarnü final asaya saka asaya mezüngbuba shilem nung team kati danga goal magütsüti asaya liasü.

Ajisüaka asaya tanabuba shilem nung Barak nungi asayar Mangkholen-i minute 51buba nung mezüngbuba goal idakja parnok tejakdang aküm.

Iba sülen minute 64buba nung Toka-i Barak atema tanabuba goal idaktsü aser minute 83buba nung Lun Kuki-i tasembuba goal idakja parnoki asaya ayong ayonga kokogo.

Asaya nung Longtork FC atema K. Assumi-i asaya atemtsü lia par team asoshi goal ka idakja liasü.

Taküm iba asayamung ya Nagaland Football Association-i ayongzük aser department balalai teyari agüja kanga takok ngua asayaogo.

## 10buba MPL Season 2025 tenzükokogo

**Kohima, Rongchii/April 1 (TYO):** 10buba Morning Premier League (MPL) Season 2025, Mongolbarnü Indira Gandhi Stadium, Kohima nung tenzükokogo. Iba asayamung ya Morning Football Association (MFA)-i ayongzüka Liranu-i teyari agüja asayadar.

Asayamung lapokba sentong nung Commandant 13th Assam Rifles Tarun Rana tongti tejaoker liasü aser Miss Nagaland 2024 Anon Konyak-i, MPL tenzüker küm 10 ajungba nüngdem nung balloon salaja liasü.

MPL ya arishi küm 35 tema aliba asayartem atema aser football asaya meimetem atema sabang tajung ka lir.

Taküm iba asayamung nung team 10-i shilem agidar.

Sentong nung o jembiba mapang Colonel Rana-i, league ya kanga balaka kechiyong iba ajanga asayartem anü adokba den külemi sakdaktsüba dang masü iba ajanga yimayimpong azüoktsü, teamwork, aser aremzüka inyaksangshitsü ajungmesor, koba football asayaba tesem nung dang masü anogoshia libaliro nung tongtibang lir, ta ashi.

Paisa, iba league ayongzükertem nem tenüngsang agütsü. Paisa team ajaki takok ngua asayatsü imlaja ataba lemsatepba liasü.

Sentong nungsa NFA tir

Burakum-i lokti pela agizükba o jembi aser Kohima District Football Association (KDFA) tir Mhasimhalie Mathew Yhome-i achaayanga asayartem tenangzüktepbu agia laisü.

KABA Pastor Bendangsashi Walling-i asayamung atema temaotsü meshizüka sarasademtsü aser Wasenya Magh-i ken tajung ka tena liasü.

Mezüngbuba asaya nung Morung United aser defending champions Mustang FC na goal 1-1 agütsür asaya tembanga point kaka nguogo.

Morung United atema Stephen-i goal idaktsü aser Setuo-i Mustang FC atema goal idakja liasü.

## Sangtemla aser Kumlong Semi Final-i iogo



6th Mokokchung Inter-Ward Football Tournament tatembangbuba Quarter Final asaya Sungkomen Ward aser Kumlong Ward tsüngda asayaba noksa

**Mokokchung, Rongchii/April 01(TYO):** 6th Mokokchung Inter-Ward Football Tournament tanu tananübuba Quarter Final asaya ana kanga dang takok ngua asaya-a tembangogo.

Tanu asoshi mezüngbuba Quarter Final asaya Sangtemla Ward aser Artang Ward asayaba nung asaya tatembangbuba minute tashi nung telok katia goal magütsüti nung tatem nung Tie-Breaker metsütep aser iba metsütepba

nung Sangtemla -i 5 agütsü aser Artang-i 3 dang agütsüti nung Sangtemla Ward-i iba asaya kokteta Semi Final asayatsü maongka ajangzüketet.

Maneni 6th Mokokchung Inter-Ward Football Tournament tatembangbuba Quarter Final asaya Sungkomen Ward aser Kumlong Ward tsüngda asayaba nung asaya tenzüker minute 31 buba nung Kumlong telok nungi jersey no-19 Medemshiba-i goal-1 yok saka iba sülen jibo Sungkomen telok nungi minute

49 aser minute 54 buba nung Takasüngba aser Tarepnungsang tenati goal kaka yokteta Sungkomen Ward-i goal-2-1 agi Kumlong Ward kokteta Semi Final asayatsü maongka ajangzüketet.

6th Mokokchung Inter-Ward Football Tournament  
02-03-2025  
Semi Final Fixture  
2:00 PM  
Mongsenbai Ward  
Vs  
Dilong Ward

## Haaland yirubasülen hopta tenet masayatetsü

**Rongchii/April 1, 2025 (Agencies):** Manchester City striker Erling Haaland, Deobarnü FA Cup quarter-final nung Bournemouth akokba asaya nung tetsüng teloktep yiruba sülen pa hopta tenet masayatetsü, ta manager Pep Guardiola-i ashi.

Norway nunger asayar ya minute 61buba nung melena liasü. Iba asaya nung pai goal ka idaktsü aser City-i goal 2-1 agi asaya koka parnok semi-finals-i iogo.

Arishi küm 24 taina asayar ya crutches bener Vitality Stadium toktsür aoba video ya social media nung lemsatepa liasü. Pa tetsüng tabelen nung protective boot semer liasü.

"Doctor-i hopta pongu nungi tenet tashi agütsü ta shiogo, ta parnoki kü dang ashi. Anungji season tatemi aser Club World Cup tenzüksüba mapang tashi nungbo pa aneper alitsü imla atar," ta Guardiola-i ashi.

City-i Hombarnü ashiba agi, Haaland yiruba asadangtsü atema specialist ka ajurutsü aser pa taküm lemluwa Fifa Club World Cup densema season nung tanungba asayatem nung asayatsü atema anema akümstü imla atar.

Deobarnü asayaba mapang Haland-i penalty ka midaktsüti aser maongka tajung ana magiteti liasü, saka Nico O'Reilly-i agütsüba ball ka pai kanga junga idaktsü aser iba sülen Omar Marmoush-i tanabuba goal idakja parnoki

asaya akok.

Tang asaya aliba season nung City atema takok marnok ka angutsü asoshi maongka alibaji FA Cup ya dang lir. Parnok Premier League nunga jenjang majung aser Champions League o Carabao Cup naprongla nungi tsükogo.

Kasa mapang nung taküm City pur tongtibang asayar aika yiruba ajanga manager Guardiola kanga timtema aruogo. Parnok Premier League nung Chelsea sülen pongububa nung lir. Champions League atema qualify asütsü asoshi parnok pezübubai atutsü nüngdaker.

Tang asaya aliba season nung asayamung ajak nung Haaland-i goal 30 idaktsüba den assist pezü süja lir.

Hopta pongu masayaba mapang Haaland, Nottingham Forest den April 26 nü FA Cup semi-finala asayatsü aliba densema asaya trok masayatetsü. Pa May 10 nü Premier League nung Southampton den asayatsü aliba asaya nungi tenzüka asayatetsü akok.

Pa hopta tenet masayatetra pa May 17 nü FA Cup final dena masayatetsü, ajisüaka ajibo City-i Forest akok nung dang ataloktsü.

May 25 nü Fulham nung tatembangbuba league asaya aser June aser July ita Club World Cup nung asayatsü atema temang anema kümer atatsü asoshi Haaland tebilemba alitsü.

## Kimatsung aser Lanu na NSC atema qualify süogo



**Dimapur, Rongchii/April 1 (TYO):** Big Bore Rifle/ Pistol dak sendakba nung 07324 India Open Competition, Army Marksmanship Unit, Mhow, Indore, Madhya Pradesh nung March 23 nungi 31 tashi asayaogo.

Iba asayamung nung Aries Rifle And Pistol Shooting Academy, Khelo India Centre, Dimapur nungi Kimatsung Jamir aser Lanu Akumtoshi Jamir nati shilem agia liasü.

Kimatsung ya 10m Air Rifle,

50m Rifle Peep Sight Prone aser 50m Rifle Peep Sight 3 Position nung asayar tajung ka lir pai tebur kija asayaya nung 285/300 score süa pa jejang 41buba nung tembang aser Lanu Akumtoshi Jamir-i 278/300 score süa pa 10buba nung tembanga liasü.

Tenaprongla National Shooting Championship Competition 2025 atema qualify süogo, ta Aries Rifle And Pistol Shooting Academy Secretary, Vikuo Metha-i sangdong ka ajanga metetdaktsü.

## BILEMDANGANG

"Taküm nung nisung ajak temulung asütsüsabo nai minyaktettsü."